

Premi «Milestone» per duos progets engiadinais

■ (anr/mfo) Per minch'institu-ziun o gestiun chi survain ün premi «Milestone» es quai üna grond'onur. Quel premi vala nempe sco «Oscar dal turissem svizzer». In mardi han la destinaziun turistica Scuol/Engiadina/Samignun/Val Müstair sco eir il «Romantik Hotel Muottas Muragl» pudü tour incunter ün dals premis uschè bainvis. Il «Premi d'ambaint» cha l'Associaziun da turissem svizra scumparta in occasiun da la surdatta dal premi «Milestone» es gnü scumparti quist'on a duos progets. Tuots duos han persvas causa lur lavur persistenta e, sco chi'd es gnü declarà, perquai chi sun tuots

duos fich innovativs e muossan gronda professionalità – nun hajan però da chefar nöglia ün cun l'oter e nu possan perquai neir na gnir congualats. Persvas han duos progets engiadinais: per üna la destinaziun turistica Scuol Engiadina Bassa/ Samignun/Val Müstair e per l'otra la renovaziun e l'ingrandimaint da l'Hotel Muottas Muragl. Pels respunsabels dals progets vendchaders es il premi, survgni a Berna, la conferma dad avair inchaminà la güsta via. Per la regiun es il premi ultra da quai ün dals meglders möds per far reclama.

> PAGINA 10



La destinaziun turistica Scuol/Engiadina Bassa/Samignun/Val Müstair ha survgnü il «Premi d'ambient» dal Turissem svizzer. Quist es gnü surdat in occasiun dal scumpart dals premis da «Milestone».



Il «Romantik Hotel Muottas Muragl» ha survgnü la segunda part dal «Premi d'ambient» da la «Milestone» e vain nomnà da la giuria da quella concorrenza sco «hotel chi dess esser ün bun exaimpel per tuots». FOTOS MAD

Duos progets indigens survegnan «l'Oscar» dal turissem

Il Milestone va a la Destinaziun turistica Engiadina Bassa/Samignun/Val Müstair e Muottas Muragl

DA MARTINA FONTANA / ANR

■ **Il Premi dal Milestone, per uschè dir «l'Oscar dal Turissem svizzer», es gnü scumparti quist on per la dudeschavla vouta. Differentas spartas turisticas vegnan resguardadas pro la surdatta dals premis fich bainvis. Illa categoria dal «Premi d'ambient» han persvas quist on güsta duos progets engiadinai: per üna la destinaziun turistica Scuol Engiadina Bassa/Samignun/Val Müstair e per l'otra la renovaziun e l'ingrondimaint da l'Hotel Muottas Muragl.** Il «Premi d'ambient» cha l'Associazion da turissem svizra scumparta in occasiun da la

surdatta dal premi «Milestone» es quist on gnü dat a duos progets. Tuots duos han persvas causa lur lavur persistenta e perquai chi sajan tuots duos fich innovativs e muossan gronda professionalità – nun hajan però dachefar nöglia ün cun l'oter e nu possan perquai neir na gnir congualats. Il premi, dotà cun 5000 francs, va a la destinaziun turistica Scuol/Engiadina Bassa/Samignun/Val Müstair (TESSVM) ed al «Romantik Hotel Muottas Muragl».

Ingaschamaint a favur da natüra ed avegnir cun persistenza

Sco chi'd es gnü comunicà dals respunsabels dal premi Milestone ha

persvas la TESSVM impustüt culla lavur chi vain prestada in möd persistent. Manzunà vain però eir il fat cha la regiun posseda – cun la Clostra Son Jon a Müstair e l'Unesco Biosfera Val Müstair-Parc Naziunal – duos labels da l'Unesco. Implü vegnan nomnats il Parc Naziunal Svizzer e la spüerta regiunala dad auas termalas sco basa importanta per la surdatta dal premi. Cha'ls cumüns idillics sainza congual, ideals per passantar las vacanzas, la cultura rumantscha sco eir la produzzion e la vendita da prodots indigens, haja però dat andit da valütar la destinaziun turistica sco tala sco favorita pel premi, vegna scrit in üna co-

municaziun als mezs da massa. «Il proget es ün model unic e special chi dess dar andit da seguir eir ad otras regiuns», argumentescha la giuria da la Milestone.

Onur pel

«Romantik Hotel Muottas Muragl»

La segunda part dal «Premi d'ambient» d'ingon da la Milestone es gnü surdat al «Romantik Hotel Muottas Muragl». L'hotel chi'd es gnü fabricà avant circa 100 ons es dal 2010 nemp gnü renovà ed ingrondi. «L'center da quellas lavuors stà la persistenza, saja quai pro las lavuors architectonicas sco eir pro quellas energeticas», ha argu-

mentà la giuria da la Milestone sia decisiun. Cha grazcha a materials natürels chi sun gnüts nüzzats in tuot ils regards pro la renovaziun e pro l'ingrondimaint da l'hotel saja gnüda s-chaffida ün'atmosfera unica pels giasts. Eir l'investiziun in sondas da terra, ün indriz solar ed ün indriz fotovoltaic ha persvas la giuria. «Il Romantik Hotel Muottas Muragl es per uschè dir dvant il placat da reclama per persistenza e natüra da la regiun», esa gnü dit in mardi saira a Berna, ingio cha'ls premis da «Milestone» sun gnüts surdats als rapreschantants da las differentas regiuns o als respunsabels dals progets chi han guadagnà la concorrenza.